



**XUNTA
DE GALICIA**

Convenio de colaboración educativa entre a Xunta de Galicia, a través da Consellería de Cultura, Educación e Ordenación Universitaria, e a Fundación Centro Oncolóxico de Galicia José Antonio Quiroga y Piñeyro para a impartición de ensinanzas de formación profesional da familia de Sanidade

Santiago de Compostela, quince de setembro de dous mil dezaseis

REUNIDOS

Dunha parte, don -----, conselleiro de Cultura, Educación e Ordenación Universitaria da Xunta de Galicia, en representación desta consellería, e de conformidade coas atribucións conferidas no artigo 34.1 da Lei 1/1983, do 22 de febreiro, de normas reguladoras da Xunta e da súa Presidencia e nos Decretos 129/2015, do 8 de outubro, polo que se fixa a estrutura orgánica das consellerías da Xunta de Galicia e 4/2013, do 10 de xaneiro, polo que se establece a estrutura orgánica da de Cultura, Educación e Ordenación Universitaria.

E doutra don -----, director xerente da Fundación Centro Oncolóxico de Galicia José Antonio Quiroga y Piñeyro, en nome e representación dela, e facultado para este acto mediante o poder outorgado ante o notario do Ilustre Colexio da Coruña D. -----, con data 6 de outubro de 2015, e número de protocolo 3788.



Interveñen en función dos seus respectivos cargos e en exercicio das facultades que en nome das entidades que representan, teñen conferidas e,

EXPOÑEN

1. Que a Lei orgánica 8/2013, do 9 de decembro, para a mellora da calidade educativa, modifica a redacción do apartado 2 do artigo 39 da Lei orgánica 2/2006, do 3 de maio, de educación, e determina no seu punto 32 que a formación profesional, no sistema educativo, ten por finalidade preparar ao alumnado para a actividade nun campo profesional e facilitar a súa adaptación ás modificacións laborais que podan producirse ao longo da súa vida, contribuír ao seu desenvolvemento persoal e ao exercicio dunha cidadanía democrática, e permitir a súa progresión no sistema educativo e no sistema de formación para o emprego, así como a aprendizaxe ao longo da vida.
2. Que a Consellería de Cultura, Educación e Ordenación Universitaria, consciente da necesidade de potenciar a formación profesional, en particular a que precisa o sector sanitario, obrígase a abrir camiños e a desenvolver novas profesións demandadas polo mercado de traballo. Para solucionar isto no marco legal vixente, interesa experimentar os novos ciclos formativos que permiten a permanente adaptación dos currículos ás novas profesións. Neste sentido, estase impartindo o novo ciclo formativo de Radioterapia e Dosimetría.
3. Que o Real decreto 772/2014, do 12 de setembro, polo que se establece o título de Técnico Superior en Radioterapia e Dosimetría e se fixan as súas ensinanzas mínimas, contempla que a competencia xeral deste título consiste en aplicar tratamentos con radiacións ionizantes baixo prescrición médica, utilizar equipos provistos de fontes encapsuladas ou produtores de radiacións, aplicando as normas de radioprotección xerais e específicas, e asistindo ao paciente durante a súa estancia na unidade, así como realizar procedementos de protección radiolóxica hospitalaria, seguindo normas de garantía de calidade e os protocolos establecidos na unidade asistencial.
4. Que o título de Técnico Superior en Radioterapia e Dosimetría substitúe ao de Técnico Superior en Radioterapia que xa se viña impartindo no CIFP Ánxel Casal-Monte Alto, da Coruña, en colaboración coa Fundación Centro Oncolóxico de Galicia José Antonio Quiroga y



Piñeyro desde o curso 2005/06. O último convenio asinado é do ano 2007 e asináronse as correspondentes addendas ata o curso 2014/15.

5. Que no CIFP Ánxel Casal-Monte Alto comezou a impartirse, no curso 2015/2016, o ciclo formativo de grao superior de Radioterapia e Dosimetría, e para o curso 2016/2017 non dispón das instalacións e do equipamento mínimo necesario para poder impartir os módulos de Dosimetría física e clínica e de Simulación do tratamento, que corresponden ao segundo curso do referido ciclo.

6. Que a Fundación Centro Oncolóxico de Galicia José Antonio Quiroga y Piñeyro dispón dos espazos e dos equipamentos necesarios, para poder impartir os módulos referidos no apartado anterior e está disposta a seguir coa colaboración mantida ao longo destes últimos anos.

Por todo isto, estas institucións están dispostas a colaborar de forma conxunta, para continuar coa oferta de ensinanzas de formación profesional da familia de sanidade, en base ás seguintes,

CLÁUSULAS

Primeira. O obxecto do presente convenio é establecer a colaboración no eido da formación profesional entre a Consellería de Cultura, Educación e Ordenación Universitaria e a Fundación Centro Oncolóxico de Galicia José Antonio Quiroga y Piñeyro da Coruña, para seguir impartindo as ensinanzas de formación profesional da familia de sanidade, concretamente o ciclo formativo de grao superior de Radioterapia e Dosimetría, no CIFP Ánxel Casal-Monte Alto da Coruña.

Segunda. A Consellería de Cultura, Educación e Ordenación Universitaria autorizará a posta en funcionamento e a organización das ensinanzas de formación profesional específica do ciclo formativo de grao superior de Radioterapia e Dosimetría, que se impartirán compartidamente nas instalacións do CIFP Ánxel Casal-Monte Alto e nas instalacións da Fundación Centro Oncolóxico de Galicia José Antonio Quiroga y Piñeyro.

Terceira. A impartición das ensinanzas de formación profesional específica do ciclo formativo de grao superior de Radioterapia e Dosimetría nas instalacións da Fundación Centro Oncolóxico de Galicia José Antonio Quiroga y Piñeyro, refírese ao módulo de Dosimetría física e clínica e



ao de Simulación do tratamento, para os que cómpren unhas instalacións especiais das que non dispón o CIFP Ánxel Casal Monte-Alto.

Cuarta. A Fundación Centro Oncolóxico de Galicia José Antonio Quiroga y Piñeyro achegará o profesorado especialista necesario para o desenvolvemento dos módulos referidos na cláusula anterior, que se imparten na citada fundación. A impartición destes módulos por profesorado especialista está prevista no anexo III A) do Real decreto 772/2014, do 12 de setembro polo que se establece o título de Técnico Superior en Radioterapia e Dosimetría e se fixan as súas ensinanzas mínimas.

A Consellería de Cultura, Educación e Ordenación Universitaria farase cargo dos gastos de funcionamento necesarios para o desenvolvemento das ensinanzas obxecto deste convenio, os dous módulos do ciclo formativo de grao superior de Radioterapia e Dosimetría, e que se estiman nun importe máximo de 36.000 euros para o curso 2016-2017 e que se repartirán do seguinte modo: 15.000 euros para o ano 2016 e 21.000 euros para o ano 2017, con cargo ao concepto orzamentario 10.60.422M.229 no que se contemplan os gastos de funcionamento dos centros que imparten ciclos formativos. O dito importe transferirase ao CIFP Ánxel Casal-Monte Alto da Coruña, que deberá xustificar estes gastos de acordo co Decreto 201/2003, do 20 de marzo, polo que se desenvolve a autonomía na xestión económica dos centros docentes públicos non universitarios.

Quinta. Estas ensinanzas formarán parte da oferta formativa do CIFP Ánxel Casal-Monte Alto, para todos os efectos académicos e administrativos. Correspóndelle á Consellería de Cultura, Educación e Ordenación Universitaria o establecemento, o desenvolvemento e a supervisión dos plans educativos propios da consellería. O centro, nos seus ciclos formativos específicos, queda sometido ao servizo de inspección educativa da Consellería de Cultura, Educación e Ordenación Universitaria, segundo a normativa vixente para os centros públicos.

Sexta. Establecerase unha comisión de seguimento, control e supervisión, que se reunirá cando se considere oportuno por calquera das partes asinantes.

Esta comisión estará constituída por:

- a. Tres persoas representantes da Consellería de Cultura, Educación e Ordenación Universitaria.



- b. Tres persoas representantes da Fundación Centro Oncolóxico de Galicia José Antonio Quiroga y Piñeyro.
- c. Un/ha funcionario/a da Consellería de Cultura, Educación e Ordenación Universitaria que actuará como secretario/a.

Sétima. As funcións da comisión serán as seguintes:

- a. Planificar e programar as accións relativas ás ensinanzas obxecto deste convenio.
- b. Fixar as normas para establecer a coordinación de horarios do persoal laboral, persoal docente e alumnado que realiza as súas actividades nas mesmas instalacións.
- c. Autorizar as actividades complementarias de interese para as ensinanzas profesionais obxecto deste convenio.
- d. Programar a realización do módulo de formación en centros de traballo.
- e. Efectuar o seguimento e a avaliación do convenio e propor as modificacións que se xulgaren necesarias.

Oitava. Este convenio entrará en vigor no curso 2016/2017, terá unha vixencia dun curso académico e prorrogarase por acordo expreso das partes mediante a addenda anual correspondente. O convenio poderá ser denunciado por calquera das partes por incumprimento das obrigas previstas no mesmo. A denuncia esixirá escrito motivado dirixido á comisión de seguimento, cunha antelación de tres meses. En todo caso, a supresión das ensinanzas realizarase curso a curso ata a súa extinción definitiva.

Novena. De conformidade co disposto na Lei orgánica 15/1999, do 13 de decembro, de protección de datos de carácter persoal, e co Real decreto 1720/2007, do 21 de decembro, polo que se aproba o Regulamento de desenvolvemento da citada Lei orgánica, o alumnado e a fundación que por razón das actividades formativas teñan acceso a datos de carácter persoal, non disporán dos mesmos con finalidade distinta á esixida polas accións formativas.

Décima. A firma deste convenio suporá o consentimento expreso do interesado á administración para incluír e facer públicos os datos referidos ao convenio de conformidade co artigo 15 da Lei 1/2016, do 18 de xaneiro, de transparencia e bo goberno, co artigo 8 da Lei 9/2013, do 9 de decembro, (BOE 10-12-2013) de transparencia, acceso á información pública e bo goberno e co



Decreto 126/2006, do 20 de xullo, polo que se regula o Rexistro de Convenios da Xunta de Galicia.

Décimo primeira. Carácter administrativo do convenio. O presente convenio de colaboración posúe carácter administrativo por razón do contido e materias sobre as que o mesmo versa, as cales ao abeiro do disposto no artigo 4 do Real decreto legislativo 3/2011, do 14 de novembro, polo que se aproba o texto refundido da Lei de contratos do sector público, o exclúen do seu ámbito de aplicación, sen prexuízo da aplicación dos principios desta lei para resolver as lagoas ou dúbidas que a súa aplicación suscite.

Dada a natureza administrativa deste instrumento xurídico, as controversias ou cuestións litixiosas que puideran xurdir na súa aplicación e non puidesen ser solucionadas no seo da comisión de seguimento, serán resoltas pola xurisdición contencioso-administrativa.

E en proba de conformidade co exposto, ambas as partes firman o presente convenio por triplicado, no lugar e data indicados no encabezamento.

O conselleiro de Cultura, Educación e
Ordenación Universitaria

O director xerente da Fundación Centro
Oncolóxico de Galicia José Antonio Quiroga
y Piñeyro
